



## Chambre des Députés

### Compte rendu officiel

**Supplément commun aux quotidiens et magazine online :**  
Luxemburger Wort, Tageblatt, Zeitung vum Lëtzebuurger Vollek  
et Lëtzebuurger Journal

**Contenu rédactionnel :**  
Service du compte rendu de la Chambre des Députés  
Service des relations publiques de la Chambre des Députés  
Tél. 466 966-1

**Saisie de texte :**  
Polygraphic SA, Esch-sur-Alzette

**Conception et mise en page :**  
Espace Médias SA, Esch-sur-Alzette

**Concept et coordination générale :**  
BRAIN & MORE, agence en communication, Luxembourg

**Imprimeries :**  
Saint-Paul Luxembourg SA 2, rue Christophe Plantin L-2988 Luxembourg  
Editpress SA 44, rue du Canal L-4050 Esch-sur-Alzette

Rapporteur, hei ugefaangen huet, vun Heesprénger ze schwätzen, hat ech ee Moment Angscht, mir géifen iwwer eppes Negatives schwätzen, nämlech iwwert déi sougenannt Finanzinvestisseuren, déi gären emol esou genannt ginn. Glécklecherweis war dat net esou. Mir hunn iwwer aner Katastrophe geschwat, wou dëse Projet de loi hëllef soll. An ech mengen, datt eebe grad déi Hëllef immens wichteg ass. An duerfir gi mir och den Accord fir déi 19. Reconstitution vum der AID.

► **M. Fernand Etgen**, *Président*.- Merci villmools, Här Clement. D'Regierung huet d'Wuert, den Här Finanzminister Pierre Gramegna.

### Prise de position du Gouvernement

► **M. Pierre Gramegna**, *Ministre des Finances*.- Gudde Mëtteg, Här President. Dir Dammen an Dir Hären Deputéierten a Regierungskolleeg, hei besteet jo eppes no bei der Unanimitéit, an dat freet mech, zur Occasioun, wou mer den 19. Programm vun der AID, Association internationale de développement, hei am Gesetzesprojet presentéieren.

D'Kontribution vun Lëtzebuerg ass effektiv 61 Milliounen ronn, an dat ass eng Augmentatioun vu 4,5 Milliounen, déi mer dann där Agence zur Verfügung stellen, vun där 76 Länner beneficiéieren. Dat sinn déi äermste Länner vun der Welt. E Land wéi Nigeria, wat virdu genannt ginn ass, ass zum Beispill net an de Beneficiairen, vun deenen hei geschwat gëtt, vun deene 76 äermste Länner.

Wat vläicht wichteg ass ze ënnersträichen, dat ass, dass d'AID och decidéiert huet, eng Procédure d'urgence ze maachen, fir deene Länner entgéintzekommen, déi Konsequenze vun der Pandemie Covid hunn. A si hunn dann do eng Fast-Track-Approach ugehall, wat eng guut Noriicht ass, well da kann een deene Länner séier hëllefen.

Déi Hëllef, déi dann an deem Kontext gemaach gëtt, ass nëmmen eng bei deene ville Katastrophen an anere Problemer, déi déi Länner hunn. An ech géif gären dem André Bauler Merci soe fir säi schrëfflechen a mündleche Bericht, wou dann eng Rëtsch vun deenen opgezielt sinn, wou et der leider ganz vill ginn, déi ëmmer derbäikommen, niéft deene villen, déi scho souwisou bestinn.

Ech wëll awer e bëssen drop agoen, wat de Rôle vu Lëtzebuerg an der Banque mondiale ass, well hei och gefrot ginn ass, wat dann de Poids vu Lëtzebuerg ass, firwat mir méi bezuehlen als Prozentsaz un d'Banque mondiale wéi zum Beispill Brasilien oder den Iran.

Fir d'éischt muss ech emol soen, dass et do Krittäre gëtt, déi den FMI an d'Banque mondiale säit laanger Zäit applizéieren. An et ass esou, dass Lëtzebuerg effektiv en Undeel huet, och stëmmerrechtmissig, am FMI an an der Banque mondiale, deen un e Schlëssel ugegledert ass. An dee Schlëssel, deen huet eng Rëtsch Variabelen a sech an dee gëtt all Joers nei gerechent.

An dee Schlëssel vu Lëtzebuerg, dee geet relativ reegelméisseg erop, aus zwee Grënn: éischstens well mer vill Wuessstum hunn an zweetens well eise Bättrag zum Commerce international reegelméisseg klëmmt.

Dat erkläert, firwat mer nach virun e puer Joer op 0,18 % waren an haut si mer op 0,21 %. Elo reng vum Wirtschaftlechen oder vum Image aus gekuckt, kann ee sech jo wierklech driwwer freeën, dass eis Kontribution jo an d'Luucht geet. Dat ass nämlech e Spigelbild vun eiser gudder wirtschaftlecher Gesondheet.

Mee doriwwer ewech, mengen ech, muss ee sech awer och bewusst sinn, dass dat heiten en Deel vun eiser Entwécklungshëllef ass. An eis

Entwécklungshëllef, wéi Der alleguerte wësst, ass eng vun deenen héchsten am Prozentsaz op der Welt, iwwer 1 % vun eise PI. An dës 61 Milliounen, op néng Joer opgegliddert, sinn natierlech hei mat gezielt, soudass mer hei e multilateralen Effort maache mat deenen 61 Milliounen, fir eist Zil vun 1 %, wat, ech mengen, och keen heibannen a Fro stellt, ze erreechen.

An ech mengen, et ass och wichteg, dass mer eng Opdeelung hunn zwëschent deem, wat mer bilateral maachen, an deem, wat mer multilateral maachen. An dofir geet et net duer, a mengen Aen, dee Prozentsaz vun 0,21 elo an d'A ze faassen. Et muss ee sech bewusst sinn, dass dat do en Deel vun engem Ganzen ass, vun eiser ganzer Entwécklungshëllef, déi zum groussen Deel am Ministère de la Coopération au développement gemaach gëtt, mee wou vun deem Effort awer zu 15 % vum Finanzministère gemaach ginn, an haaptsächlech iwwer multilateral Hëlfehen.

Et geet also drëms, hei och ze gesinn, dass Lëtzebuerg e responsabelt Land ass, wat seng international Roll seriö hëlt. An dofir mengen ech, ass et begrëssenswäert, dass mir allegueren, dass Dir allegueren deen heite Projet ënnerstëtzt, à tout le moins ënnerstëtzt oder neutral bewäert. Dat hei ass fir eisen Image immens wichteg. An ech mengen, doriwwer wäert keen zweifelen, dass et en fait fir eist Land en Aushängeschëld ass, dass mer generéis sinn. Dat dréit zum Rayonnement vun eise Land bäi.

Ech soen lech Merci, an ech soen net Amen.

### (Hilarité)

► **Une voix**.- Très bien!

► **M. Fernand Etgen**, *Président*.- Merci villmools, Här Finanzminister Pierre Gramegna. D'Diskussion ass elo ofgeschloss.

Mir kommen elo zur Ofstëmmung iwwert de Projet de loi 7610. Den Text steet am Document parlementaire 7610<sup>3</sup>.

### Vote sur l'ensemble du projet de loi 7610 et dispense du second vote constitutionnel

Fir d'éischt de Vote électronique fir déi perséinlech Stëmmen. Duerno maachen ech den Appel nominal fir d'Votes par procuration. Wien e Vote par procuration wëllt ofginn, soll d'Hand an d'Luucht hiewen.

### Appel nominal (votes par procuration)

De Vott ass domadder ofgeschloss. De Projet de loi 7610 ass mat 56 Jo-Stëmme bei 4 Abstentionen ugehall.

*Ont voté oui : Mmes Diane Adehm, Nancy Arendt épouse Kemp, MM. Emile Eicher, Félix Eischen (par M. Paul Galles), Paul Galles, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Georges Mischo, Mme Octavie Modert, M. Laurent Mosar, Mme Viviane Reding (par M. Aly Kaes), MM. Gilles Roth, Marco Schank, Marc Spautz, Serge Wilmes, Claude Wiseler et Michel Wolter ;*

*MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusty Graas, Max Hahn, Mme Carole Hartmann, MM. Pim Knaff, Claude Lamberty et Mme Lydie Polfer ;*

*Mme Simone Asselborn-Bintz, M. Dan Biancalana, Mmes Tess Burton, Francine Closener, MM. Yves Cruchten, Mars Di Bartolomeo, Georges Engel, Claude Haagen, Mmes Cécile Hemmen et Lydia Mutsch ;*

*Mme Semiray Ahmedova (par Mme Josée Lorsché), MM. Carlo Back, François Benoy, Mmes Djuna Bernard, Stéphanie Empain, Chantal Gary, M.*

*Marc Hansen, Mme Josée Lorsché et M. Charles Margue ;*

*MM. Sven Clement et Marc Goergen ;*

*MM. Marc Baum et David Wagner.*

*Se sont abstenus : MM. Jeff Engelen, Gast Gibéryen, Fernand Kartheiser et Roy Reding (par M. Fernand Kartheiser).*

Freet d'Chamber d'Dispens vum zweete Vote constitutionnel?

### (Assentiment)

Et ass also esou decidéiert.

## 7. 7427 - Projet de loi portant modification de la loi modifiée du 14 août 2000 relative au commerce électronique

Dee leschte Punkt vum Ordre du jour vun haut ass de Projet de loi 7427 iwwert den E-Commerce. An ech géif direkt d'Wuert un d'Rapporteuse vun dësem Projet de loi ginn, déi honorebel Madamm Lydia Mutsch. Madamm Mutsch, Dir hutt d'Wuert.

### Rapport de la Commission de l'Économie, de la Protection des consommateurs et de l'Espace

► **Mme Lydia Mutsch** (*LSAP*), *rapporteuse*.- Merci, Här President. An deene leschte Woche konnte mer schonn oft hei ënner Beweis stellen, dass zu Lëtzebuerg d'Informations- an d'Kommunikationstechnologien zu de strategesche Secteure gehéieren, déi mir virrangeg hei bei eis entwéckele wëllen, och fir dass mer e gesonden an diversifizéierten Tissu économique kënnen behalen.

Den Haaptobjekt vun dësem Gesetzesprojet betrëfft eis Beméiung, fir déi bestoend Legislation, déi vun 2000 ass, konform ze setze mat europäesche Reglementer am Beräich vun den elektronischen Transaktiounen, Stéchwuert elektronesch Identifikatioun a Service-de-confiancen, ëm déi et hei geet.

Schonn an hirer Kommunikatioun vum 26. August 2010 ënnert dem Titel „Une stratégie numérique pour l'Europe“ hat d'EU-Kommission d'Fragmentatioun vum Marché numérique, déi feelend Interoperabilitéit vun de Systemer a virun allem och de wuessende Problem vun der Cyberkriminalitéit als déi gréisste Bremse vun enger digitaliséierter Economie an Europa ausgewisen.

D'Ambitioun vum europäesche Legislatuer ass et natierlech, an dat kënnen mir guut novollzéien heibannen, fir e juristesche Kader unzebidden, dee méiglechst komplett ass, dëst fir an engem harmoniséierte Bannemaart eng Interoperabilitéit tëscht de verschiddene Systemer ze assureieren, déi am Idealfall an de 27 Memberstaaten en place gesat géif ginn.

D'Potenzial vun den Informations- a Kommunikatiounstechnologien konsequent ze notzen, setzt natierlech viraus, dass de Bierger Vertrauen an déi Technologien huet. D'Vertrauen, d'Verlässléikeet an d'Veracitéit vun den elektronischen Transaktiounen sinn eebe ganz einfach eng Grundvoraussetzung, fir dass sech dee Secteur laangfristeg a positiv entwéckele kann.

Et ass genee an där Optik, wou d'europäescht Reglement Exigence festleet: fir d'Services de confiance bei enger elektronischer Ënnerschrëft, engem elektronische Stempel, bei Zäitstempelen, beim Verschécke vun engem elektronische Recommandé oder och bei der Authentifikatioun op enger Internetsäit, wat mer alleguerte ganz heefeg maachen.

Dat europäescht Reglement 910/2014 ass nämlech d'Grondlag vun deem heite Gesetz oder vun der Ännerung an ënnerscheet tëscht de Services de confiance qualifiés an de Services de confiance non qualifiés. Parallell dozou mécht d'Reglement och par analogie en Ënnerscheed tëscht engem Prestataire de services de confiance qualifiés an engem Prestataire de services de confiance non qualifiés.

Am Fall vun engem Service de confiance qualifié ënnerleien de Prestataire an den ugebuedene Service vill méi strenge Krittären, wat natierlech dann och d'Sécherheet an d'Fiabilitéit eropsetzt. Well bei engem Service de confiance qualifié eebe grad méi héich Standards d'Reegel sinn, genéisste si doduerch eng Presomption d'intégrité et d'exactitude.

Konkreet huet dëst virun allem zur Konsequenz, an dat interesséiert d'Konsumenten oder d'Utilisateurs, dass den Utilisateur eebe grad vun der Charge de la preuve fräigesprach ass am Fall vun enger Contestatioun.

D'Services de confiance non qualifiés profitéieren natierlech vun enger Clause de non-discrimination, well se eeben awer och geprëift ginn. Mee dat heescht just, dass hire juristeschen Effekt an hir Recevabilitéit als Préuve viru Geriicht net einfach mam Argument kënnen verworf ginn, dass se eebe „jus“ elektronischer

Natur sinn. Du hues also scho gewësse Rechter, allerdéngs muss de Benotzer vum Service gegebenefalls viru Geriicht ënner Beweis stellen, dass d'Fiabilitéit vum Service garantiert ka ginn.

Ech hat virdu vum Vertraue geschwat, dat d'Bierger an déi Servicer mussen hunn, grad wéi an de Prestataire vum Service musse kënnen hunn. Ouni dat geet et eebe ganz einfach net. An d'Vertrauen an e Prestataire, dat ergëtt sech natierlech aus den Obligatiounen, déi de Prestataire kritt, déi d'Sécherheet vun all deenen Transaktiounen, vun deenen ech grad geschwat hunn, erméiglechen.

D'Obligatiounen aus dem Reglement si ganz, ganz villfältiger Natur an och ganz komplex. Ech ginn do wierklech net op all Detail an. Mee sou gëtt et zum Beispill d'Obligatioun vun der Informatioun vum Titulaire vum Certificat. All Titulaire muss op d'mannst ee Mount, ier säi Certificat effektiv ofleeft, doriwwer informéiert ginn. An all Prestataire muss och direkt de Certificat vum Titulaire revoquéieren, wann deen dat géif froen.

Dat si just zwou Dispositiounen als Illustratioun a fir ze ënnersträichen, wéi wichteg dëst Reglement am Alldag ka sinn, wichteg virun allem, wat déi legitimm Rechter vum Titulaire ubelaangt, a fir déi och ze assureieren, dat ëmsou méi, wann ee weess, dass elektronesch Applikatiounen ëmmer méi den Alldag vun eis allegueren elo scho prägen an och an Zukunft wäerten nach verstärkt bestëmmen.

Eng fundamental Obligatioun ass natierlech, dass de Prestataire bis an dee leschte Wénkel konform muss sinn zu den héijen Exigence vum europäeschen Datschutz. Ëmmer erëm kënn dat Stéchwuert erëm. De Prestataire kann deemno a kengem Fall mat Hëllef vun Drëttpersounen Donnéeën iwwert den Titulaire sammeln, ouni dass den Titulaire him virdrun au préalable den Accord dozou ginn hätt. Déi perséinlech Donnéeën, déi gesammelt ginn, déi dierfen dat och just zum eenzegem Zweck vun der Delivrance a vun der Conservatioun vum Certificat. Do muss ee ganz guut drop oppassen.

Dëse Gesetzesprojet ass doriwwer eraus awer och wichteg, fir verschidde Froen am Kontext vun elektronische Servicer ze klären, notament de Regimm vun den administrativen a penale Sanktiounen - do hu mer relativ laang an der Kommissioun driwwer geschwat - oder och d'Bestëmmen vun engem nationale Kontrollorgan, grad wéi de Rôle vun dësem Gremium am Gesamtkontext. Dir wësst et heibannen, do ass als nationaalt Kontrollorgan bei eis d'ILNAS, also d'Lëtzebuurger Institut fir d'Normalisatioun, d'Akkreditatioun, d'Sécherheet an d'Qualitéit vun de Produiten an de Servicer, festgehalen.

Ech wëll hei, fir komplett ze sinn, ervirsträichen, dass Lëtzebuerg sech duerch eng ganz besonnenes Situation kennzeechent. Si ass e bëssen aneschters wéi an anere Länner, mee mir si jo och e bëssen aneschters wéi aner Länner. Am Moment ziele mir nämlech am Grand-Duché grad emol zwee Prestataires de services de confiance qualifiés, déi op där berüümter vun der Europäescher Kommissioun gefouerter Trusted List repertoriéiert sinn. Just een dovunner traitéiert d'Authentifikatioun op Internetsäiten an Zäitstempelen.

Elo zum Staatsrot. Deen huet sengersäits a sengem éischten Avis, well et ginn der e puer, véier Opposition-formellé gemaach, déi awer iwwert d'Amendementen vun der Ekonomieskommissioun aus dem Wee konnte geraumt ginn. An dat huet da relativ schnell derzou gefouert, dass de Staatsrot seng Opposition-formellé schonn am éischten Avis complémenteaire konnt ophiewen. Et ass dobäi notament ëm d'Prézisiere vun der Natur vun der Sanktioun duerch d'ILNAS gaangen - ech hu gesot, do hu mer e bësse méi doriwwer geschwat -, am Fall, wou e Prestataire eng Identifikatiounsmethod, déi net méi konform ass, géif weiderhi benotzen. Dat ka jo virkommen.

Op d'Prozedur, déi am Fall, wou e Prestataire seng Aktivitéiten astellt, ouni dass et an anere Prestataire iwwerhëlt, ze respektéieren ass, huet de Staatsrot a sengem Avis higewisen. En huet nämlech gesot, dass déi Dispositiounen do ronderëm méi enk gefaasst an och méi prezis misste gehandhaabt ginn. An d'ILNAS huet och an där Situatioun keen Derogatiounsrecht méi.

Am zweete grad wéi och am drëtten Avis complémenteaire huet sech de Staatsrot an der Haaptsaach mat de penale Sanktiounen beschäftegt, déi sech an engem neien Artikel, deem berüümte 45bis, erëmfannen. Déi nei Dispositiounen kéimen eebe grad zum Drogen, wann





d’Konditiounen vun engem Transfert vun den Aktivitéiten vun engem Prestataire de services qualifizéiert op en anere Prestataire de services qualifizéiert net géife respektéiert ginn.

De Staatsrot huet du gemengt, dass am Gesetzesprojet ni engem Renvoi op déi pertinent Dispositioun aus dem europäesche Reglement weider Präzisierungen eisichter zur Konfusioun géife féieren. Dat hu mir och esou gesinn. De Parquet général grad wéi de Parquet vu Lëtzebuerg a vun Dikrech hu sech hirersäits an hirem Avis eng méiglechste Präzis Formulatioun gewünscht, déi iwwer en einfache Renvoi erausgeet.

Och hei ass eng Léisung fonnt ginn, soudass den Text, esou wéi en haut zum Vott steet, a mengen Aen e ganz equilibriéierten ass. Dat huet d’Kommissioun och esou gesinn an déi néideg Rechtssécherheet an allen Dispositiounen ass dann och garantéiert, sou wéi mir et alleguete gären hätten. An et ass jo grad dat, wat sech och d’Ubidders an och mir als Konsumenten am meeschte wënschen.

Dëst gesot, wëll ech den Accord vun der sozialistescher Fraktioun mat op de Wee ginn an op alle Fall och Merci fir d’Opmerksamkeet soen.

► **M. Fernand Etgen, *Président***.- Merci villmools, der Rapportrice, der Madamm Lydia Mutsch. Als éischte Riedner ass déi honorabel Madamm Diane Aehm agedroen. Madamm Aehm, Dir hutt d’Wuert.

## Discussion générale

► **Mme Diane Aehm (CSV)**.- Villmools merci, Här President. Fir d’éischt wëllt ech och der Madamm Mutsch villmools Merci soe fir hiren ausféierleche mëndlechen a schrëftleche Rapport. Et ass e Projet de loi, deen effektiv immens technesch ass. Et ass awer e Projet de loi, deen eis als Bierger vun dësem Land allequerten immens vill brénge wäert, well en eebe wirklech de Commerce électronique weesentlech vereinfache wäert op verschidden Aart a Weisen.

Ech hätt eigentlech e puer Froen dozou ze stellen.

Déi éischt, dat ass: Mir kréien hei iwwert de Wee vun europäesche Reglement eng Definitioun vun der Signature électronique. An do ass meng Fro un de Minister, ob an deem Kader déi Definitioun, wéi mir se de Moment am Code civil hu vun der Signature électronique, ob déi nach ëmmer déi richteg ass oder ob déi eventuell muss ugepasst ginn am Kader vun deem Gesetzesprojet, dee mer haut stëmme wäerten. Et ass den Artikel 1322, d’Signature électronique am Code civil? Dat ass déi éischt Fro.

An déi zweet Fro, déi ech och un den Här Minister hätt, dat ass: Am Kader vun dem Courrier électronique sécurisé ass an der Kommissioun driwwer geschwat ginn, wéi den Här Minister selwer nach President vun der Kommissioun war, also wéi en nach Deputéierter war, dass, wa mer elo méi Prestataire hätten, déi Courrier électronique sécurisé géifen ubidden, dass hie sech do virstelle kéint, dass een e gewëssent Clearinghouse kéint en place setzen. Dat wier dann eng Plattform, wou een déi verschidde Clienten a Prestataire vun engem Courrier électronique sécurisé géif zesummebréngen.

An dofir meng Fro un de jëtzege Minister, ob en da gedenkt, dat an Zukunft als Minister ëmzesetzen, wat en a senger Funktioun als President vun der Kommissioun selwer an d’Spill bruecht huet.

A ganz zum Schluss géif ech nach eng Bemierkung maachen. Dat ass: Selbstverständlech gi mir dovunner aus, dass den Dateschutz bei dësem Gesetz respektéiert gëtt. An ech géif och ofschléissend den Accord vun der CSV zu dësem Gesetzesprojet ginn.

Merci.

► **M. Fernand Etgen, *Président***.- Merci villmools, Madamm Aehm. Da wier et um honorabelen Här Guy Arendt. Här Arendt, Dir hutt d’Wuert.

► **M. Guy Arendt (DP)**.- Merci, Här President. Ech wëllt och virop der Rapportrice e grouse Merci soe fir dee schrëftlechen a mëndleche Rapport. Hautdesdaags verleeft den Echange tëscht de Bierger an den Entreprises an den ëffentlechen Institutiounen ëmmer ëfters iwwert den elektronische Wee. Vill Servicer, fir déi ee sech fréier huet missen déplacéieren, kënnen haut bequemer vun doheim aus erleeedegt ginn. Fir déi meescht Transaktiounen ass den direkte Kontakt tëschent zwou Personnen oft net méi noutwendeg.

An Zukunft wäerten ëmmer méi Onlineservicer opdauchen, déi sensibel Donnéeën iwwert den elektronische Wee echangéieren. Dofir ass et besonnesch wichteg, d’Sécherheet (veuillez lire: d’Sécherheet ze assuréieren) an den Zougang zu dësen Donnéeën ze begrenzen.

D’Digitaliséierung vun den Dénegschtleeschtingen erfuerdert nei Methoden, fir déi betrafte Parteien ze identifizéieren. Op dëser Plaz kommen dann déi sougenannte Services de confiance an d’Spill. D’Roll vun dëse Servicer ass, d’Identitéit vun den Onlinenotzer an och vun den Internetsäiten ze iwwerpräiwen an ze validéieren. D’Prestataire vun dëse Services de confiance erstellen dowéinst virtuell Ënnerschrëften a Certificaten, mat deenen hir Clienten sech kënnen ausweisen.

An de leschte Jore gouf et gréisser Problemer, well Servicer vun deene verschiddene Firmen net matenee kompatibel waren. D’Onlinenotzer sinn ëmmer nees op technesch Barrière gestouss. Genée dëse Problem huet d’Europäesch Unioun am Kader vum eIDAS-Reglement probéiert ze léisen. D’EU huet nämlech e System agefouert, deen eng géigesäitig Unerkennung vun de Prestataire erméiglecht a soumat d’Kompatibilitéit vun hire Servicer erlaabt.

Här President, am Numm vun der Demokratescher Partei kann ech dëse Projet de loi nëmme guttheeschen. D’Regierung huet sech engagéiert, d’Attraktivitéit vum Lëtzebuerger ICT-Secteur auszubauen. Dëse Projet de loi entsprécht also kloer deenen Iddien vun der Demokratescher Partei.

Eishtens stärke mir d’Vertraue vun den Notzer an d’Servicer vun der digitaler Identifizierung.

Zweetens ginn déi elektronesch Transaktiounen duerch d’Interaktioun vun de Provider vill méi benotzerfrëndlech. Dëst vereinfacht zemoos den Echange tëschent de verschiddenen EU-Memberstaaten.

Des Weideren hu mir eis fir d’Schafung vun engem digitale Bannemaart fir Europa agesat.

Mat dësem Reglement huet d’Europäesch Unioun ee wichtige Schratt an dës Richtung gemaach, an als liberalen Deputéierte kann ech d’Transpositioun vum europäeschen Text nëmmen ënnerstëtzen, a mir sinn iwwerzeegt, dat eist Land dovunner wäert profitéieren.

Här President, léif Kolleeginnen a Kolleegen, ech soe Merci fir d’Nolauschteren a ginn op alle Fall den Accord vun der DP zu dësem Projet.

► **Plusieurs voix**.- Très bien!

► **M. Fernand Etgen, *Président***.- Merci villmools, Här Arendt. An ech ginn d’Wuert weider un den honorabelen Här Charles Margue. Här Margue, Dir hutt d’Wuert.

► **M. Charles Margue (déi gréng)**.- Merci, Här President. Léif Kolleegen a Kolleeginnen, merci der Kollegin Lydia Mutsch fir de gudden mëndlechen a schrëftleche Rapport: komplizéiert Matière, exzellent duergestallt!

Bei dësem Projet geet et eeben net just, wéi den Titel et seet, ëm de Commerce électronique. Et geet méi wäit. Et geet, wann een en an de Kontext setzt, virun allem ëm den digitale Volet vun engem vun de wichtigsten Trëmp a Stärken vun eiser Europäescher Unioun: dem europäesche Marché unique, dem sougenannte Bannemaart.

Et ass, wéi gesot, eng vun de gréissten Errungenschaften, déi mer an der Europäescher Unioun hunn. Net nëmmen huet en e groussen Undeel dorun, dass mir mëttlerweil 75 Joer Friden an der EU hunn. Lëtzebuerg huet och e ganz groussen Deel vu sengem haitege Wuelfstand dësem oppene Maart ze verdanken. Ouni déi oppe Grenzen an déi staark wirtschaftlech Zesummenaarbecht mat eisen europäesche Partner hätt eis Wirtschaft sech an deene leschte Jorzéngte wuel kaum esou positiv entwéckelt.

Fir dass dëse Marché unique och an Zukunft weider eng Tromp bleift fir eist Land a fir déi ganz EU, muss en déi nei wirtschaftlech Realitéiten ugepasst ginn. Eng dovunner ass kloer d’Digitaliséierung, déi ni hire potenziellen negativen Effekter och eeben eng Chance ass, eis Economie méi nohalte opzestellen.

Wa mer als Europäesch Unioun wirtschaftlech attraktiv bleiwen an d’Chancë vun der Digitaliséierung notze wëllen, da komme mer net derlaanscht, aus dem Marché unique, wéi mäi Virriedner et elo grad gesot huet, en digitale Marché ze maachen. D’eIDAS-Reglement war an ass dofir e wichtegt Instrument. Dovu profitéieren d’Betriber zum Beispill am Finanzsektor an an der Logistikbranche, wou déi digital elektronesch Authentifizierung eng ëmmer méi grouss Roll spillt. Mee mir hëllefen awer och de Konsumenten, vun deene sech der haut vill eng Welt ouni mobilen Token oder e Smartphone, mat deem ee seng Bankgeschäfte online erleeedegt kann, net méi virstelle kënnen.

An och d’Zäiten, an deenen all Prozedure bei enger staatlecher Verwaltung hu missen iwwert de Pabeier erleeedegt ginn, sinn zimmlech eriwwer. Hei si mer an de leschte Jore schonn e wäite Wee gaangen an dee sollte mer och weidergoen.

E weidert Beispill vun engem Beräich, wou d’Konsumenten, d’Leit vum Ausbau vum digitale Marché profitéieren kënnen, ass d’Ofschafung vum Geoblocking. Virun engem gudden Joer, et war de Gesetzesprojet 7366 zum Geoblocking, hu mir als Chamber e Reglement an eis national Gesetzgebung ëmgesat, deen de Geoblocking am Onlinehandel zu engem groussen Deel ofschafft. Zum Beispill dierf een eng Kreditkaart aus dem EU-Ausland net méi refuséiert kréien.

Dee fir de Konsument am Alldag wichtigste Geoblocking am Online Commerce, an dat weisen d’Ëmfroen, ass awer dee vun der Musek a vum Videostreaming vun all deene Plattformen, déi net an der EU egal wéi an all Land d’selwecht disponibel sinn. Dëse Geoblocking ass nach ëmmer eng Realitéit. D’EU-Kommissioun sollt dëst Joer eng Revisioun vun deene Reegelen presentéieren a mir hoffen, dass dës am Sënn vum Konsument ausfalle wäert.

De Gesetzesprojet, dee mer haut stëmme, ass also en Deel vum Wee an d’Richtung vun engem harmoniséierten europawäiten digitale Marché, dee Konsumenten a Betriber, wéi gesot, zeguttkënnt.

Souwäit dës puer Iwwerleeungen zu dësem Gesetzesprojet, zu deem ech natierlech den Accord vun der grénger Fraktioun ginn. Merci.

► **M. Fernand Etgen, *Président***.- Merci villmools, Här Margue. Da wier et um honorabelen Här Gast Gibéryen.

► **M. Gast Gibéryen (ADR)**.- Merci, Här President. Och vun eiser Säit e Merci un d’Kolleegin Lydia Mutsch als Rapportrice, déi et verstanen huet, dësen dach komplizéierte Projet ze erklären, datt déi meescht vun eis, géif ech mengen, e verstanen hunn. An nodeems datt meng Virriedner nach op eng Rei vu Punkten agaange sinn, weess ech wirklech net méi, wat ech nach kéint vun Intelligenz bei dësem Projet bäibréngen ausser der Zoustëmmung vun eiser Fraktioun.

► **M. Fernand Kartheiser (ADR)**.- Très bien!

► **M. Fernand Etgen, *Président***.- Merci villmools, Här Gibéryen. Leschten agedroene Riedner ass den honorabelen Här Sven Clement. Här Clement, Dir hutt d’Wuert.

► **M. Sven Clement (Piraten)**.- Merci, Här President. Merci och der Rapportrice, dem Lydia Mutsch fir den ausféierlechen an och exzellente schrëftlechen a mëndleche Rapport. Et ass keng einfach Matière, dat heiten. Et ass eng Matière, déi vill technesch Wësse virussetzt an et ass virun allem eng Matière, déi, wann ee sech e bësse méi intensiv domadder auserneeetzt, awer eng ganz Rëtsch oppe Fro mat sech bréngt.

D’eIDAS-Reegele si gutt. Op den éischte Bléck alles super: Mir kréien en europäesche Kader.

Et ass op den zweete Bléck, wou et grad hei zu Lëtzebuerg dach awer eng Rëtsch oppe Fro bei deem Projet ginn. Sou ass et haut leider esou, an e puer vu menge Virriedner hunn et gesot, datt mir am Moment just zwee Acteuren hunn, déi zu Lëtzebuerg akkreditéiert sinn, fir qualifizéiert Servicer ze offérieren. An dovunner ass u sech just een, deen dat un Endnotzer verkeeft, dat heescht un lech allequerten. A mir wäerten allequerte quasi esou en Token vun deenen an der Täschen hunn, well d’Banken eis déi geschenkt hunn, wéi mer e Kont opgemaach hunn, respektiv hunn eis imploréiert, esou een ze huelen, fir eng besser Sécherheet ze hunn.

Elo huet jiddwereen deen Token ëmmer mat méi Sécherheet fir de Webbanking a Verbindung bruecht respektiv nach à la limite, fir sech domadder beim guichet.lu kënnen anzeloggen. Datt do derhannert e kryptografesche Schlëssel steet, deen eis erlaabt, och online Saachen ze ënnerschreiwen, ass deene wéinegste bewosst.

De Problem, dee sech elo stellt mat den eIDAS-Regelen ass deen, datt mer e Quasimonopol zu Lëtzebuerg hunn. Wien haut probéiert, sech op guichet.lu mat engem däitschen oder franséische Certificat anzeloggen oder e PDF vun der Steierverwaltung mat engem franséische Certificat ze ënnerschreiwen, ma dee scheitert ganz einfach dorunner, well - A, Lëtzebuerg oblige! - mir hu leider just e Support fir den Token, deen d’Lëtzebuerger kennen, wou de Staat och nach deels Aktionär mat dran ass, wat déi ganz Situatioun net manner kokass mécht.

Dat heescht, et muss ee sech d’Fro stellen: Bréngt dat heite Gesetz wirklech déi Ännerungen, déi mer eis erhoffen? Maache mer et wirklech Startuppen, kleng Betriber méi ein-

fach, fir Dokumenter ze ënnerschreiwen, fir Dokumenter ze echangéieren? Am B2B, also zwëschen zwee Betriber, sécherlech.

Am B2B ass et nämlech egal, ob et eng qualifizéiert Ënnerschrëft ass oder eng avancéiert Ënnerschrëft. Fir eng avancéiert Ënnerschrëft brauch ech kee Certificat vum Staat, kee Stempel, dee seet: „Dat doten ass eng offiziell Ënnerschrëft.“ Do kann ech relativ maachen, wat ech wëll. Do geet et duer, wann ech an engem PDF mäin Numm dropsetzen. Dat ass schonn eng einfach elektronesch Ënnerschrëft.

Et geet awer vill méi wäit. Spéitstens wa mer mam Staat kommunizéieren, mat de Verwaltungen, hu mer zu Lëtzebuerg dach dee Quasimonopol. An ech mengen, datt et wichteg ass, datt mer deen och opbriechen an et heimad der kleng Betriber méi einfach maachen, fir ouni onnëtz Käschten och déi heiten Dokumenter kënnen beim Staat ze deposéieren.

Dat heescht: Ass et geplangt - an dat ass eng ganz konkret Fro un d’Regierung -, datt de guichet.lu respektiv de MyGuichet PDFen, déi mat anere Certificate wéi engem Lëtzebuerger geschen ënnerschriwwen sinn, akzeptéiert?

An dann dat Zweet: Sinn eis Verwaltungen, wa mir dat heite stëmme, muer prett, fir en Envoi recommandé électronique unzehuelen, esou wéi en hei am Gesetz steet?

Well, an dat muss mer eis bewosst sinn, léif Kolleeginnen a Kolleegen, dat heiten ass e risege Sprong no vir! Déi éischte Kéier, wou mer et wirklech obligatoresch maachen, datt ee kann e Recommandé mat Accusé de réception verschécken, ouni aus dem Haus erauszugehen! Et kann ee vun engem Computer op en anere Computer eng E-Mail verschécken, déi déi nämlech Rechtskraaft huet wéi en Envoi recommandé mat Accusé de réception. Dat ass phenomenal, wann et fonctionéiert! An ech hoffen, datt mer a kierzester Zäit eis Verwaltungen esou wäit kréien, datt se dat heiten akzeptéieren.

Dat gesot, de Projet ass gutt. Un der Ëmsetzung muss e gemooss ginn. Ech ginn den Accord vun de Piraten.

► **M. Marc Goergen (Piraten)**.- Ganz gutt!

► **M. Fernand Etgen, *Président***.- Merci villmools, Här Clement. D’Regierung huet d’Wuert, den Här Wirtschaftsminister Franz Fayot.

## Prise de position du Gouvernement

► **M. Franz Fayot, *Ministre de l’Économie***.- Merci, Här President. Léif Deputéierten, mam Vott haut an der Chamber vun dësem Gesetz ass Lëtzebuerg elo komplett eIDAS-compliant a kompatibel mat alle Servicer ronderëm déi elektronesch Identitéiten wéi der Signature oder dem elektronische Stempel.

D’Leit dobaussen, an dat ass och scho vu verschiddene Riedner gesot ginn, dierft interesséieren, datt mer mat dësem Gesetzesprojet och dem elektronische Recommandé eng legal Basis hei zu Lëtzebuerg ginn. D’Lëtzebuerger Post schafft dorunner, fir hire Clienten et ze erméiglechen, den ageschriwwene Brëif iwwert den elektronische Wee ze verschécken.

An och dat ass gesot ginn: Mir hunn allequerte gesinn, wéi wichteg et ass an Zäite vu Covid, fir esou vill wéi méiglech kënnen online ze maachen. Dat hei ass also eng Facilitéit méi, ee Service méi, deen iwwert dee Wee elo méiglech gëtt. Wann en Destinataire de Recommandé op sengem Computer net unhëlt, da gëtt de Courrier als normale Recommandé iwwert de Postwee zougestallt.

eIDAS steet fir eng uniform Legislatioun ronderëm esou elektronesch Servicer bannent der EU, déi vun all de Memberstaate gläichermoossen unerkannt an transposéiert gëtt. Dat ass, och dat ass schonn e puermelo gesot ginn, eng ganz wichteg Viraussetzung fir den Erfolleg vun engem digitale Bannemaart. A mir wëssen allequerten, dass dat eng vun de Prioritéiten ass, net nëmme vun dëser Regierung, mee och vun der Europäescher Kommissioun. Mir hunn dat och geschéit vum Thierry Breton héieren, dee jo och hei an der Chamber war a mat deem ech och geschéit Nomëtten e Gespréich hat.

Zur Erënnerung sief gesot, dass Lëtzebuerg am Beräich vun elektronischer Ënnerschrëft an all de Servicer, déi dorunnerhängen, mat LuxTrust schonn e relativ laangen Historique huet an och e Prestataire, deen d’Vertraue vun de Leit genéisst. Et ass als national Certificatiounsinfrastruktur, wou LuxTrust 2005 gegrënnt gouf. Wéi a villen anere Beräicher war dat e Public-private-Partnership. Via Partenariat vum Lëtzebuerger Staat mat diverse grouse Privatbanke koom dat deemools zustan, ganz besonnesch, fir den E-Banking awer och deen E-Government deemools definitiv am Grand-Duché ze lancéieren.

Scho wéi LuxTrust viru 15 Joer gegrënnt gouf, war et awer kloer, dass dat e Service wier, deen





net just fir Lëtzebuerg, net nëmme fir den nationale Marché sollt limitéiert ginn, mee deen och doriwwer eraus sollt ausgebaut ginn. Schonn deemools war gewosst, dass ee sech mëttelfristeg och iwwert d’Grenzen eraus misst hei eng Clientèle opbauen, an dat ass och an deene leschte Jore mat Succès geschitt.

Fir sech am Ausland géint d’Konkurrenz an engem internationale Kontext ze behaapten, och an engem liberaliséierte Marché, brauch een awer e staarken industriellen an e staarken technologesche Partner. An déi Partnerschaft huet LuxTrust virun zwee Joer gemaach mat der italienescher Firma InfoCert. Dat war deemools och eng logesch Suite vun der Entwécklung, fir an der Europäescher Unioun e gewëssene Poids ze kréien, mat Aktivitéiten a grouse Länner wéi Frankräich.

An der Tëschenzäit huet LuxTrust dann och eng Nidderloossung zu Paräis, mee de Sëtz vun der Firma ass nach ëmmer am Grand-Duché op der Cap. Et ass dofir wichteg, dass mer haut hei an der Chamber dëse Projet approvéeieren, deen hëlleft, Lëtzebuerg weiderhin als Standuert fir elektronesch Servicer an als Standuert vun der Informatiounssécherheet ze positionéieren.

Här President, ech géif och nach gären op déi puer Observatiounen a Froen agoen, déi vu verschiddenen Deputéierte gemaach goufen. D’Diane Adehm huet eng Fro gestallt par rapport zum Artikel 1322 vum Code civil fir ze wëssen, ob déi Definitioun vun der Signature électronique nach ëmmer à jour wär, ob déi nach ëmmer konform wär.

D’Äntwert ass Jo. Dat ass eng Definitioun, déi jo, wéi Der wësst, am Kapitel iwwert d’Preuve ass. Déi verankert d’Valeur probatoire vun der Signature électronique an eisem Droit civil. Dat ass jo wichteg. D’Lydia Mutsch huet och beschriwwen, wéi dat fonctionéiert mat de Presomptiounen, déi ëmgedréit ginn. An dat ass nach wie vor eng valabel Definitioun, déi och dowéinst vun dësem Projet net huet missen ofgeännert ginn.

Dann ass d’Fro vun deem Clearing vun deene Courriers électroniques sécurisés, an der Hypothèques, wou et méi Prestataire géif ginn, déi esou e Service géifen ubidden. Do ass et esou, dass ee muss eng Distinction maachen zwëschen der nationaler an der internationaler Dimensionsion. Am nationale Kontext ass et zimmlech kloer, dass dee Clearing bei der Post soll geschéien. Well, wéi ech gesot hunn, an all deene Fäll, wou den Destinataire de Recommandé net akzeptéiert, gëtt et eng Pabeierform, déi erausgeet, an dat kann nëmme bei der Post zesummelafen. Also aus ganz praktesche Grënn ass dat bei der Post.

Am internationale Kontext ass dat e bësse méi komplex, dat ass méiglech, mee do hänken eng Partie technesch Begebenheeten drun, déi fir de Moment menges Wëssens nach net gekläert sinn an déi och nach mussen vu menge Leit am Ministère gekuckt ginn. Dofir sinn ech fir de Moment einfach nach net capabel, lech eng Äntwert dozou ze ginn.

Beim Geoblocking, deen de Charles Margue opgeworf huet: Jo, mir wëssen, dass dat en Dauerbrenner ass. Dat ass eppes, wat schonn x-mol hei evoquéiert ginn ass och an der Chamber. Ech hunn dat och nach eng Kéier gëschter am Gespréich mam Thierry Breton opgeworf, fir ze kucken, dass mer wierklech elo endlech do derhannertkommen, well mer effektiv haaptsächlech och als klenge Land dorënner leiden, wéi Der gesot hutt, haaptsächlech am Beräich vum Film a vun der Musek, vum Video, wou mer oft keen Accès hunn. An den Thierry Breton huet mer nach eng Kéier gesot, dass d’Kommissioun amgang wär, dat ze kucken. Do kënnt eng Revisioun vun deene Reegelen. An en huet dat do matgeholl als eng Suerg an als eng Doleance, déi mer als Lëtzebuerg zu deem Punkt do hunn.

De Sven Clement huet eng Partie Punkten opgeworf an haaptsächlech bemängelt, dass et e Manque vu Reconnaissance gëtt international vu LuxTrust oder vun deem Token, dee mer iwwer LuxTrust hunn, an d’Fro, ob et geplangt ass, dass déi Identifikatioun, déi iwwer MyGuichet geschitt, och kann am internationale Beräich da geschéien.

Ech mengen, dass dat misst eng logesch Konsequenz sinn, wann deen Dispositiv hei vun eIDAS wierklech richteg fonctionéiert, dass et déi europäesch Interoperabilitéit och soll ginn. Dat hänkt, mengen ech, och vun enger Interoperabilitéit mat dem auslännesche Service of, wou dat da muss unerkannt ginn. Ech mengen, dass dat muss „at the end of the day“ wierklech d’Zil si vun esou engem Text.

Fir de Moment, wéi Der gesot hutt, ass dat nach net esou a Realitéit. Mee ech mengen, dass dat misst d’Zilsetzung sinn, wou mer mussen drop hischaffen, zesumme mat eisen Operateuren, och zesumme mat LuxTrust, awer och am Dialog an an der Diskussioun mat deenen anere Länner, déi dann och déi Certificatioun do mussen akzeptéieren.

Sommaire des séances publiques n <sup>os</sup> 49, 50 et 51	
<b>49<sup>e</sup> séance</b>	
Ouverture de la séance publique	p. 737
Heure d’actualité de la sensibilité politique Piraten au sujet du racisme et	
Heure d’actualité du groupe politique CSV au sujet de la situation de discrimination et de racisme au Luxembourg	p. 737-746
7216B - Projet de loi portant transposition de l’article 31 de la directive (UE) 2015/849 du Parlement européen et du Conseil du 20 mai 2015 relative à la prévention de l’utilisation du système financier aux fins du blanchiment de capitaux ou du financement du terrorisme, modifiant le règlement (UE) n° 648/2012 du Parlement européen et du Conseil et abrogeant la directive 2005/60/CE du Parlement européen et du Conseil et la directive 2006/70/CE de la Commission, tel que modifié par la directive (UE) 2018/843 du Parlement européen et du Conseil du 30 mai 2018 modifiant la directive (UE) 2015/849 relative à la prévention de l’utilisation du système financier aux fins du blanchiment de capitaux ou du financement du terrorisme ainsi que les directives 2009/138/CE et 2013/36/UE	p. 746-748
7567 - Projet de loi relative aux garanties professionnelles de paiement	p. 748-749
Question élargie n° 43 de M. Laurent Mosar relative aux négociations post-Brexit	p. 749-750
Question élargie n° 47 de M. Laurent Mosar relative à la zone franche opérée au Luxembourg	p. 750-751
<b>50<sup>e</sup> séance</b>	
Ouverture de la séance publique	p. 752
Dépôt d’une motion par M. Fernand Kartheiser	p. 752
Dépôt d’une motion par M. Claude Wiseler	p. 752
Dépôt d’une motion par M. David Wagner	p. 752-753
Question élargie n° 42 de M. Claude Wiseler relative aux négociations post-Brexit	p. 753-754
Résolution de M. Yves Cruchten au sujet du soutien de toutes les initiatives de l’UE visant à répondre par des mesures efficaces et proportionnelles au cas où Israël procéderait à l’annexion d’une partie du Territoire palestinien occupé depuis 1967	p. 754-755
	p. 755-756
	p. 755
	p. 756
	p. 756-758
	p. 758
	p. 758-759
	p. 759-760
	p. 759
	p. 760-761
	p. 761-762
	p. 762
	p. 762-765
	p. 765-766
	p. 765
	p. 766
<b>51<sup>e</sup> séance</b>	
Ouverture de la séance publique	p. 767
Communications	p. 767
Ordre du jour	p. 767
Question élargie n° 48 de M. Marc Hansen relative à la stratégie de l’Union européenne concernant les vaccins contre le Covid-19	p. 767-768
Interpellation de M. Marc Spautz au sujet de l’évolution du secteur de la santé et du secteur socio-éducatif en termes de personnel	p. 768-775
7610 - Projet de loi approuvant la participation du Grand-Duché de Luxembourg à la dix-neuvième reconstitution des ressources de l’Association internationale de développement	p. 775-777
7427 - Projet de loi portant modification de la loi modifiée du 14 août 2000 relative au commerce électronique	p. 777-779

ren, och zesumme mat LuxTrust, awer och am Dialog an an der Diskussioun mat deenen anere Länner, déi dann och déi Certificatioun do mussen akzeptéieren.

Voilà! Dat gesot, géif ech gären der Rapportrice e grouse Merci soe fir hire ganz detailléierten a ganz gudde Rapport zu dësem Projet de loi an och der Kommissioun Merci soe fir déi gutt Zesummenaarbecht an lech Merci soe fir déi breet Zoustëmmung zu dësem Gesetz.

► **Plusieurs voix.**- Très bien!

► **M. Fernand Etgen, Président.**- Merci, Här Wirtschaftsminister Franz Fayot. D’Diskussioun ass elo ofgeschloss.

Mir kommen elo zur Ofstëmmung iwwert de Projet de loi 7427. Den Text steet am Document parlementaire 7427<sup>16</sup>.

**Vote sur l’ensemble du projet de loi 7427 et dispense du second vote constitutionnel**

D’Ofstëmme fänkt un. Fir d’éischt de Vote électronique fir déi perséinlech Stëmmen. Duerno maachen ech den Appel nominal fir de Vote par procuration.

Wien ee Vote par procuration wëllt ofginn, soll d’Hand an d’Luucht hiewen.

**Appel nominal (votes par procuration)**

Domadder ass de Projet 7427 eestëmmeg mat 60 Jo-Stëmmen ugeholl.

Ont voté oui : Mmes Diane Adehm, Nancy Arendt épouse Kemp (par M. Marc Spautz), MM. Emile Eicher, Félix Eischen (par M. Paul Galle), Paul Galle, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Georges Mischo, Mme Octavie Modert, M. Laurent Mosar, Mme Viviane Reding (par M. Aly Kaes), MM. Gilles Roth, Marco Schank, Marc Spautz, Serge Wilmes, Claude Wiseler et Michel Wolter ;

MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusty Graas, Max Hahn (par M. Gilles Baum), Mme Carole Hartmann, MM. Pim Knaff, Claude Lamberty et Mme Lydie Polfer (par M. André Bauler) ;

Mme Simone Asselborn-Bintz, M. Dan Biancalana (par M. Georges Engel), Mmes Tess Burton, Francine Closener, MM. Yves Cruchten, Mars Di Bartolomeo, Georges Engel, Claude Haagen, Mmes Cécile Hemmen et Lydia Mutsch ;

Mme Semiray Ahmedova (par Mme Josée Lorsché), MM. Carlo Back, François Benoy (par M. Charles

Margue), Mmes Djuna Bernard, Stéphanie Empain, Chantal Gary, M. Marc Hansen (par Mme Djuna Bernard), Mme Josée Lorsché et M. Charles Margue ;

MM. Jeff Engelen, Gast Gibéryen, Fernand Kartheiser et Roy Reding (par M. Fernand Kartheiser).

MM. Sven Clement et Marc Goergen ;

MM. Marc Baum et David Wagner.

Freet d’Chamber d’Dispens vum zweete Vote constitutionnel?

**(Assentiment)**

Et ass also domat esou decidéiert.

Domat si mer um Enn vun der Sëtzung vun haut ukomm. D’Chamber kënnt muer Mëtten um 14.00 Auer nees zesummen.

D’Sëtzung ass opgehewen.

**(La séance publique est levée à 18.10 heures.)**